

## DIE “DOOP VAN GELOWIGES” (SG. BEKERINGSDOOP)



### 1. INLEIDING

Die Bybel word onvoorwaardelik deur Ignited in Christ as die Geesgeinspireerde Woord van God aanvaar. Indien die leser van hierdie dokument nie hierdie oortuiging deel nie, is dit nutteloos om verder te lees. (Die rede daarvoor is dat slegs die Heilige Gees, vanuit en deur die Woord, 'n mens van God se waarheid en wil oor hierdie onderwerp kan oortuig.)

Die Heilige Gees moet gevra word om vir die leser insig omtrent God se Heilige Waarheid te gee voordat hierdie dokument (en die Skrifverwysings wat daarmee saam gaan) bestudeer word.

Dit is tyd dat Christene (kinders van God die Vader) vir hulleself moet begin vra en uitvind wat God se waarheid omtrent die doop is. Vir té lank het Christene net blindelings aanvaar wat vir hulle van kansels af voorgeskryf is. NB: Daar is bv. vir jare van die kansels af gepreek dat “apartheid” reg is en, meer nog, Bybelgefundeerd is. Omdat Christene dit nooit bevraagteken het nie en nie vir hulleself wou uitvind wat die Heilige Waarheid van God is nie, is dit nooit bevraagteken nie en is 'n uiters groot onreg aan verskeie bevolkingsgroepe van ons land, Suid-Afrika, gedoen.

Ons is nou in 'n geestelike seisoen waarin kinders van God vir hulleself moet begin uitmaak of dit wat deur geslagte oorgelewer en geleer is in van ons kerke, werklik die wil van God is en of dit nie net bloot 'n menslike gebruik is wat later deel van kerklike dogma en tradisie geword het nie.

God eis volle gehoorsaamheid aan Hom en verwag dat ons nie Sy Woord sal vat en dit aanpas en verdraai om in te pas by wat mense wil hê nie. Dit gaan oor Sy wil en Hy seën volle gehoorsaamheid aan Hom.

God gaan nie eendag van jou verantwoordings vra oor jou gehoorsaamheid aan 'n betrokke kerk of leraar (of eggenoot of pa of ma) nie, maar wel oor jou gehoorsaamheid aan Hom en Sy Woord. Vir die Kind van God is daar baie meer rykdomme weggeleë in Sy Woord as net bekering en wedergeboorte – hoe wonderlik dit opsigself ookal reeds mag wees!!

Voordat ons kan begin praat oor die doop, is dit belangrik om eers sekere konsepte en beginsels uit te klaar. Een daarvan is die drie dimensies van die mens naamlik dat die mens uit gees, siel en liggaam bestaan en 'n ander konsep is “wedergeboorte”.

## 1.1 Drie-eenheid van die mens: Gees, Siel en Liggaam

Die mens is 'n drie-dimensionele wese wat bestaan uit gees, siel en liggaam. Hoor wat sê Paulus in 1 Tes. 5:23: *“Mag God, wat vrede gee, julle volkome aan Hom toegewyd maak en julle geheel en al, na gees, siel en liggaam, so bewaar dat julle onberispelik sal wees wanneer ons Here Jesus Christus weer kom.”*. Lees ook Heb. 4:12 waaruit dit duidelik is dat gees en siel nie dieselfde ding is nie.

By konsepsie in die baarmoeder word die siel en die liggaam van die mens geskep (Genesis 2:7) maar die gees van die mens kom van God af en word deur God in jou liggaam geplaas. Dus, by konsepsie in die baarmoeder (die punt van die mens se skepping), is al drie hierdie dimensies van menswees reeds teenwoordig.

Die gees van die mens is onsterflik en so ook die siel. Slegs die liggaam word uit stof gevorm en sal tot stof terugkeer (Genesis 3:19).

### 1.1.1 Gees (die mens se gees)

Die menslike gees is onsterflik. Hoor wat sê God vir Jeremia in Jer. 1:5: *“Voordat Ek jou in die moederskoot gevorm het, het Ek jou (jou gees) geken..”*. Die mens se onsterflike gees kom van God af (Gen. 2: 7: *“... en (God het) lewensasem in sy (die mens) se neus geblaas, sodat die mens 'n lewende wese geword het.”*).

As gevolg van die sondeval is 'n mens se gees (as 'n algemene reël) voor wedergeboorte nog “dood” vir God. Dit beteken jou gees kan nie met God se Gees kommunikeer en resoneer nie. Jou gees word egter “lewend” vir God by wedergeboorte (wanneer jy Jesus Christus as jou persoonlike Verlosser en Saligmaker aanvaar) en wanneer die verhouding tussen God en mens (wat as gevolg van die sondeval van God verwyderd geraak het) op so 'n wyse herstel word.

Hierdie wedergeboorte vind dus plaas in die menslike gees deur die onverganklike saad van God wat in die mens se gees begin wortelskiet. Dit stel die mens se gees in staat om met God se Gees te kommunikeer. By wedergeboorte trek die Heilige Gees in by jou gees en jou dormante gees word dan “aktief” vir God (1 Pet. 1:23).

### 1.1.2 Siel

'n Mens se sielsdimensie kan ook beskryf word as sy of haar “persoonlikheid” en dit bestaan uit die wil, intellek en emosie (“WIE”).

Die sielsdimensie kan nie wedergebore word nie (soos wat die gees kan nie) maar die sielsdimensie moet “bekeer” nadat wedergeboorte in die gees plaasgevind het<sup>1</sup>. Die bekering van 'n mens se sielsdimensie hou nooit op nie. Bekering is, met ander woorde, 'n herhaaldelike wegdraai van sonde en “terugkeer” na Jesus deur 'n proses van sondebelydenis, vergifnis en vrypraak.

Die denke/intellek, wil asook emosies van 'n mens moet ondergeskik gestel word aan die mens se gees want slegs die geesdimensie kan waarlik verbind en kommunikeer met God se Gees.

Dit is ook dan by die bekering van die sielsdimensie wanneer die vrug van die Heilige Gees (Gal. 5: 22 tot 26) al hoe meer behoort te begin wys in die mens se lewe. Die wedergebore mens kry dan al hoe meer die karakter en eienskappe van Jesus.

Die gees en siel van 'n mens is onsterflik en leef vir ewig (in die hel (vir ewig verlore) of in die hemel (saam met Jesus)).

### 1.1.3 Liggaam

Jou liggaam is die tydelike deel van jou menswees en is verganklik. Die liggaam is egter ook die tempel van God (se Gees) omdat jou gees (waarin God se Gees woon) en jou siel en in jou liggaam woon. 'n Mens se 5 sintuie lê in die liggaam. Die liggaam huisves die gees en siel<sup>2</sup>.

Al drie hierdie elemente (gees, siel en liggaam) vorm saam “die mens”. Opsommend kan gesê word dat die mens primêr gees is, met 'n siel wat beide “verpak” is in 'n liggaam.

## 1.2 **Wedergeboorte**

Soos hierbo genoem, vind wedergeboorte plaas wanneer ek (onder begeleiding van die Heilige Gees) vir Jesus Christus as my enigste Saligmaker en Verlosser aanvaar. Hierdie proses vind in my gees plaas en die Heilige Gees kom woon op daardie stadium in my gees. My gees word dus besny deur die Heilige Gees en dit is die besnydenis van die Nuwe Verbond van Jesus Christus en van die Heilige

<sup>1</sup> 'n “*Metanoya*” moet plaasvind – dit is die Grieks vir “to change your thinking”. Rom. 12:2: “....*maar laat God julle verander deur julle denke te vernuwe..*”. Ef. 4:23.

<sup>2</sup> 'n “*Metanoya*” moet plaasvind – dit is die Grieks vir “to change your thinking”. Rom. 12:2: “....*maar laat God julle verander deur julle denke te vernuwe..*”. Ef. 4:23.

Gees<sup>3</sup>. My gees word op hierdie stadium van wedergeboorte onbesmet en sonder sonde aangesien God (deur Sy Gees) net kan woon waar dit heilig is. Die sielsdimensie en liggaam word egter nie onmiddelik by wedergeboorte heilig en sonder sonde nie aangesien die siel en liggaam steeds onderworpe bly aan die sondeval. Dit verklaar hoekom dit so is dat wedergebore Christene steeds sonde doen (in siel en liggaam).

Baie christene wat in blote “godsdienst” is (m.a.w. hulle gaan kerk toe maar het nie ‘n intieme persoonlike verhouding met Jesus Christus nie) het slegs ‘n intellektuele verstaan van God en het Jesus Christus nog net intellektueel aangeneem en nie in die gees nie. ‘n Blote intellektuele verstaan van God en aanvaarding van Jesus Christus se bestaan, is nie wedergeboorte nie.

Jesus self het aan Nikodemus gesê in Joh. 3: 3-7: *“Daarop sê Jesus vir hom (Nikodemus): “Dit verseker Ek jou: As iemand nie opnuut gebore word nie (in die geesmens), kan hy die koninkryk van God nie sien nie.” Nikodemus vra Hom toe: “Hoe kan ‘n mens gebore word as hy al ‘n ou man is? Hy kan tog nie ‘n tweede keer in sy moeder se skoot kom en gebore word nie?” Jesus het geantwoord: “Dit verseker Ek jou: As iemand nie uit water (Woord van God) en Gees gebore word nie, kan Hy nie in die koninkryk van God kom nie. Wat uit die mens gebore is, is mens; en wat uit die Gees gebore is, is gees. Moenie verbaas wees dat Ek vir jou gesê het: Julle moet opnuut gebore word nie...”*

Wedergeboorte vind normaalweg slegs een maal plaas (in jou gees) terwyl bekering ‘n herhaaldelike proses is wat in die sielsdimensie plaasvind (elke keer wanneer ons doelbewus kies om weg te draai van sonde).

### 1.3 Die Babadoop (d.m.v. besprinkeling)

Die vereiste (soos in sommige kerke aanvaar) dat babas ten doop gebring moet word waardeur hulle met water besprinkel word, is nie Skrifgefundeerd nie maar is ‘n blote menslike instelling.

Die vroeë kerk (van Handeling in die Bybel) het “bekeerlinge” onmiddelik na hulle bekering (eintlik hul wedergeboorte) gedoop by wyse van onderdompeling<sup>4</sup>.

Frank Viola en George Barna sê in hul boek *“Pagan Christianity?”* (2008) op p. 188: *“In the first century, water baptism was the outward confession of a person’s faith. But more than that, it was the way someone came to the Lord. For this reason, the confession of baptism is vitally linked to the exercise of saving faith.”* Op bladsy 89 word gesê: *“Baptism marked a complete break with the past and a full entrance into Christ and His church. Baptism was simultaneously an act of faith as well as an expression of faith.”*

<sup>3</sup> Kol. 2:11; Rom. 2: 28 & 29

<sup>4</sup> Hand. 2:37-41:8:12, 27-38; 9:18; 10:44-48; 16:14-15, 31-33; 18:8; 19:1-5; 22:16.

Aan die begin van die 2de eeu na Christus, het sekere invloedryke Christene egter begin verkondig dat die doop voorafgegaan moet word deur 'n tydperk van lering, gebed en vas. Dit het later so erg geword dat nuwe bekeerlinge omtrent 3 jaar moes wag voordat hulle gedoop kon word. Die mense moes eers bewys dat hulle leefwyse waardig genoeg is om gedoop te kan word aangesien die dwaling ingekom het dat die doop die enigste manier is waarop sondes vergewe kan word. (Dus sou enige sondes gepleeg na die doop nie vergewe kon word nie...(!)<sup>5</sup>.)

Later (in die 2de helfte van die 2de eeu na Christus) het die Rooms Katolieke Kerk besluit dat dit beter is om sommer reeds babas van gelowige ouers te doop<sup>6</sup> en dit eerder deur besprinkeling. Dit was op grond van die gebruik van die heidene (wat deur Keiser Konstantyn in die Kerk ingenooi is) om hul babatjies aan die songod (Baäl) toe te wy direk na geboorte deur hul te besprinkel met water. Nog later (in die 5de eeu) het die babadoop die volwasse doop of doop van gelowiges heeltemal in die Katolieke Kerk vervang<sup>7</sup> en Christene wat wou vashou aan die ware doop van gelowiges (deur onderdompeling) is vervolgd deur die Katolieke Kerk en wreed vermoor.

Die babadoop deur besprinkeling het dus in die kerk ingekom vanweë oorgelewerde Roomskatolieke Kerk gebruike wat tradisie en dogma geword het sonder dat enigiemand ondersoek het en bevraagteken het of dit nog Skrifgetrou is ... (?!).

Die feit dat die babadoop (veral deur die meer tradisionele kerke) voorgehou word as die enigste doop wat 'n kind van die Here behoort te ondergaan tydens sy of haar leeftyd, is pertinent strydig met Jesus se opdragte in die Bybel en berooft Christene van 'n groot deel van God se waarheid, geestelike krag en seën.

Enige persoon wat hierdie dokument lees en van mening is dat die babadoop wel deur die Woord van God en dus deur Jesus self ingestel is, word uitgedaag om slegs een teksvers te gaan soek wat dit onomwonde sou bewys – daar is geen. Finis Jennings Dake in sy boek “*God’s Plan For Man*” (2004) sê op bladsy 985 die volgende oor die vraag of daar enige verwysings na babadoop is in die Bybel: *“There is not one word that mentions any such practice. On the contrary, it is clear from Scripture that baptism is only after men have repented and have been born again by the Spirit of God. Infants are not lost due to the fact that they are not old enough to be responsible for their sins and therefore could not repent of known sins. Therefore they can not be fit candidates for water baptism, which is the symbol of the death, burial and resurrection of Jesus Christ and a testimony to the world that the individual has been saved from a life of sin and is walking in newness of life. Only personal disciples and followers of Jesus Christ were commanded to be baptized (Mt. 28: 19-20; Mk. 16: 15-16; Acts 2: 38-39).”* Soos wat Dake sê, is

<sup>5</sup> Frank Viola en George Barna “*Pagan Christianity? (Exploring the roots of our church practices)* 2008 p. 190

<sup>6</sup> Hoofsaaklik as gevolg van bygelowigheid. Viola en Barna p. 274

<sup>7</sup> Viola en Barna p. 274

daar daarenteen verskeie plekke in die Bybel wat verwys na die bekeringsdoop van gelowiges wat ook as die “doop van gelowiges” bekendstaan.

Verlossing op grond van geloof in Jesus Christus is egter ‘n persoonlike ervaring en kinders moet eers oud genoeg word om Jesus Christus se persoonlike verlossing te kan aanvaar voordat hulle gedoop kan word.

Kinders wat nog te jonk is om self vir of teen Jesus te kan kies (selfs indien hul ouers ongelowiges is), sal Hemel toe gaan en is gered indien hul sou sterf voordat hul Jesus kon aanneem<sup>8</sup> op grond van God se genade.

Die Bybel vereis geloof en belydenis van sonde voordat iemand gedoop kan word. Geen kind kan dit doen voordat hy oud genoeg is om dit te verstaan nie.

Dit is en bly egter kosbaar as 2 ouers besluit om hul kind aan God toe te wy. In sommige kerke word dit ‘n “inseëning” genoem. Dit is bloot ‘n publieke verklaring dat hul hul kind in die weë van die Here wil grootmaak. Die baba Jesus is ook so deur Sy ouers na die tempel geneem om daar geseën te word<sup>9</sup>.

## 2. **WAT MAAK DIT SAAK INDIEN MENSE AS BABAS GEDOOP WORD - HUL KAN MOS ALTYD WEER LATER HULLESELF LAAT “GROOT” DOOP? HOEKOM DIE BOHAAI?**

Die valse heidense praktyk om babas ten doop te bring deur middel van besprinkeling, maak dit moeilik vir gelowiges om (later in hul lewens) Jesus se opdrag omtrent die ware bekeringsdoop te gehoorsaam sonder om te moet erken en verklaar dat die babadoop nie die werklike doop van Jesus volgens die Skrif is nie. Die belofte wat sekere Christene dan ook in hul betrokke kerklike denominasies as deel van geloofsbelydenis afgelê het dat “*die leer deur die betrokke kerk verkondig die enigste ware leer is en dat hulle alle ander leringe wat daarmee in stryd is sal verwerp*”, help ook nie juis dat hierdie Christene die waarheid oor die doop van gelowiges kan insien en aanvaar nie. Die babadoop asook die geloofsbelydenis in sommige tradisionele kerke vorm as’t ware ‘n geestelike sluier oor daardie gelowige se geestesoë en – ore sodat daardie gelowige nie die waarheid kan of wil insien nie.

Sekere kerklike dogma staan die bekeringsdoop pertinent teen en verkondig steeds dat die babadoop die enigste ware doop is en dat dit dus “nie nodig” is vir ‘n kind van die Here om hom/haarself weer deur die bekeringsdoop te laat gaan nie. Die geeste van godsdien, tradisie en dogma (almal demoniese geeste) hou baie mense dus gevange en hul voel dat gehoorsaamheid aan die bekeringsdoop hul nou “verraaiers” van hul betrokke kerk, leraar of selfs ouers gaan maak. Weereens moet die gelowige hom/haarself afvra: Verwag Jesus Christus

---

<sup>8</sup> Mat 18:1 – 10 en 19:14

<sup>9</sup> Luk. 2: 25- 40

gehoorsaamheid aan 'n kerk, dominee of ouer (wanneer dit gaan oor dinge van Sy Koninkryk) of aan Hom en Sy opdragte, soos uiteengesit in Sy Woord?

Dit gaan telkens by die babadoop (veral vir die ouers) meer oor die tradisie om in ouma of oupa se dooprokkie gedoop te word en die familiebyeenkoms daarna as wat dit werklik gaan oor wat Jesus van ons verwag en 'n erns met en gehoorzaamheid aan Sy Woord. Die misleiding in sekere kerklike denominasies is tragies...

Die enkele vraag wat christene hulself behoort af te vra is: *“Wil ek Jesus Christus gehoorzaam en Sy opdragte (soos in die Woord) uitvoer of wil ek eerder aan menslike dwaalleringe en dogma gehoorzaam wees?”* Dit is onnodig om te sê dat enigiets wat deur mense bokant God gestel word (bv. in dié geval valse menslike leringe) 'n afgod is en opsigself 'n gruwel is in die oë van God.

In Efesiërs 4 vers 5 sê Paulus: *“Daar is net één Here, één geloof, één doop, één God en Vader van almal...”* Dit is dus duidelik vanuit die Woord dat daar net een doop is wat van God die Vader af kom en enige lering wat dus propageer dat meer as een tipe doop aanvaarbaar vir God is, is dwaalleer.

### 3. WIE MOET HOM/HAAR LAAT DOOP?

Elke mens wat glo in Jesus Christus as die Verlosser, Saligmaker en Here van hul lewens moet gedoop te word<sup>10</sup>. Dit sluit met ander woorde in enige kinders van God (of anders gestel “gelowiges” of “bekeerlinge”).

Dit is dus nie net 'n godsdienstige aktiwiteit nie maar vind plaas wanneer jy ontdek wat God se wil is vir jou lewe en wanneer jy Jesus Christus in jou gees, siel en liggaam as jou persoonlike Verlosser en Saligmaker aanvaar.

Verskeie teksverse kan in hierdie verband bestudeer word<sup>11</sup>.

### 4. HOEKOM IS DIT NODIG OM DEUR DIE BEKERINGSDOOP TE GAAN?

NB: Dit is 'n direkte opdrag van Jesus en is nooit deur Hom teruggetrek of gekwalifiseer nie<sup>12</sup>.

Die doop van gelowiges is dus nie, soos wat sommige mense dink, opsioneel of net vir die wat wil nie. Almal wat in Jesus Christus glo moet gedoop word anders is hul doodeenvoudig nie gehoorzaam aan hul saligmaker en verlosser, Jesus Christus, se opdragte nie.

<sup>10</sup> Mar. 16:16

<sup>11</sup> Mat. 28:19; Mar.16:16; Hand 2: 38; Hand 8: 12-16, 36-38; Hand 9:18; Hand 10: 48; Hand 16: 33; Hand 18: 8; Hand 22:16; 1 Pet. 3:21

<sup>12</sup> Mat. 28: 18 – 20; Mar. 16: 15-16

## 5. HOE MOET GEDOOP WORD?

Deur onderdompeling. Die Griekse woord wat gebruik word in die Nuwe Testament elke keer wanneer daar van die doop gepraat word is “*baptidzu*” (vanaf *baptu*). Volgens Dake<sup>13</sup> beteken die griekse woord “*baptidzu*”: “*to bury, to immerse and to submerge*”.

Die Griekse woord “*baptidzu*” het nog nooit beteken om te besprinkel of te giet nie. Dake sê verder<sup>14</sup>: “*The testimony and practice of the early Church Fathers is that immersion was the only mode of baptism. Therefore, no modern Church has the right to change or modify the New Testament commands on baptism or to change the literal and commonly known meaning of baptidzo, that is, “bury, immerse and submerge” to that of “sprinkling” or “pouring”. All arguments that it is impractical, dangerous to health, indecent and inconvenient are not sufficient to change the specific commands of the Bible.*”

Voorbeelde in die Bybel:

- Doop deur Johannes die Doper in die naam van God – Mat. 3:11, Luk. 3, Hand 1:5, Joh. 1:31 tot 34;
- Doop deur Jesus se dissipels in die naam van die Vader – Joh. 3: 22-23, Joh. 4:1-2;
- Christelike doop – opdrag van Jesus om in die naam van die Vader, die Seun en die Heilige Gees te doop (Mat. 28:19);
- Jesus se eie doop deur Johannes die Doper (Mat. 3: 13-17; Mar. 1: 9-11; Luk. 3: 21-22); en
- Fillipus doop die Ethiopier (Hand. 8: 38-39).

## 6. WAT IS DIE BETEKENIS VAN DIE DOOP VAN GELOWIGES?

### 6.1 Eenwording met Jesus (in Sy kruisdood en opstanding)

Tydens die doop word ons een met Jesus in Sy kruisdood en opstanding. Kolossense 2: 12: “*... omdat julle saam met Hom begrawe is in die doop, waarin julle ook saam opgewek is deur die geloof in die werking van God wat Hom uit die dode opgewek het.*”

Paulus sê ook in Romeine 6:3: “*Of weet julle nie dat ons almal wat in Christus Jesus gedoop is, in sy dood gedoop is nie?*”

Dit beteken dat daar dus openlik verklaar word dat alles wat Jesus vir ons verwerf het met sy dood en opstanding, nou aan ons behoort aangesien ons dan saam met Hom gesterf en opgestaan het.

<sup>13</sup> P. 535 under the heading “4. The Mode of Baptism”

<sup>14</sup> Same reference as 16. above



Jesus het, na Sy afsterwe aan die kruis, ter helle neergedaal en die sleutels van die doderyk weggeneem van Satan (Openbaring 1:18). Met Sy opstanding het Hy die dood finaal oorwin asook die mag van die sonde om ons te veroordeel en Satan se reg om ons, as gevolg daarvan, in die hel te werp.

Jesus het met Sy kruisdood en opstanding die dood en dus alle bose magte finaal oorwin en hulle in Sy triomftog meegevoer (Kol. 2:15).

Indien ons dan saam met Jesus al hierdie dinge deurmaak in die doop, dan beteken dit die volgende vir ons:

- Indien Jesus in Sy dood en opstanding vir Satan en al sy bose magte oorwin het, dan is dieselfde oorwinning ook vir ons waar;
- Indien Jesus, op grond van Sy gehoorsaamheid aan die Vader tot in Sy dood, dan verhef is deur die Vader om gesag te hê oor al die bose magte, dan geld dieselfde ook vir ons;
- Indien Jesus ter helle neergedaal het en die sleutels van die Koninkryk teruggevat het vanaf Satan dan beteken dit dat daardie sleutels van die Koninkryk ook nou aan ons behoort aangesien ons een geword het met Jesus in Sy kruisdood en opstanding.

## 6.2 Word beklee met Jesus Christus

Deur jou doop verklaar jy openlik dat jy saam met Jesus Christus gesterf het en begrawe is en sodoende jou ou, sondige en minderwaardige lewe afgelê het. Jy verklaar ook dat jy saam met Jesus Christus opgestaan het in 'n nuwe lewe en dat jy jou so met Christus beklee<sup>15</sup>. Galasiërs 3:27: “... want julle almal wat in Christus gedoop is, het julle met Christus beklee.”

## 6.3 'n Uiterlike teken of seël van die besnydenis van die Nuwe Verbond

Die doop is 'n uiterlike teken of simbool van die besnydenis van die nuwe verbond naamlik die besnydenis van die gelowige se gees wanneer hy of sy tot wedergeboorte in Jesus Christus kom. Die gelowige staan dus nooit weer onder die veroordeling van die wet nie en sy of haar gees is voor God sonder sonde<sup>16</sup>.

Hierdie besnyding van die gees kan egter ook by die doop gebeur indien die gelowige eers werklike wedergeboorte by die doop ervaar.

---

<sup>15</sup> Rom. 6: 3 & 4; Kol. 2:11-15

<sup>16</sup> Kol. 2: 11-15.

#### **6.4 Dit simboliseer dat die krag van die wet en sonde oor jou lewe gebreek is**

Wanneer jy gered word op grond van jou geloof in Jesus (by jou geestelike wedergeboorte), word al jou sondes in jou geesmens weggewas. Jou sondes word in werklikheid weggewas deur die bloed van Jesus en jy word geregverdig gemaak voor God.

Wanneer jy onder die water gedompel word by die doop, is dit bloot simbolies daarvan dat jou vleesmens nou saam met Jesus gekruisig word en dat sonde en die dood dus nie meer 'n houvas oor jou sal hê nie.

#### **6.5 Simbool van die afsterwe van die ou mens en die opstanding in 'n nuwe lewe**

Jy los dus by die doop die ou vleesmens agter. Dit is dus nou na die doop nie meer jy wat lewe nie maar Christus wat in jou lewe. Galasiërs 2: 20: *“Ek is met Christus gekruisig, en ek leef nie meer nie, maar Christus leef in my...”*

#### **6.6 Simbool van ons nuwe innerlike verbintenis met God**

Wanneer ons Jesus as ons Verlosser en Saligmaker ontvang, ontstaan daar 'n onsigbare band met God en ontvang ons ook die Heilige Gees in ons menslike gees. Wanneer dit gebeur, het ons 'n nuwe direkte geestelike band met Jesus want die Heilige Gees is die Een wat ons verbind aan Jesus.

'n Mens kan die doop amper sien as 'n openbare handeling waarmee jou aanneming as kind van God in die openbaar deur Jesus bevestig word. In die Bybelse tyd het 'n pa wat 'n kind wou aanneem vir daardie kind 'n kleed voorberei ('n sg. erfgenaamskleed). Hy het dan in die openbaar uitgeroep: *“Dit is my seun/erfgenaam!”* en die kleed vir die seun aangetrek.<sup>17</sup> Iets soortgelyks gebeur in die gees by die doop van gelowiges.

#### **6.7 NB: Die doop red nie**

Dit is baie belangrik om te onthou dat die doop self jou nie red nie – net deur jou geloof in Jesus Christus word jy gered. Daar is verskeie tekste in die Woord wat dit bevestig<sup>18</sup>.

### **7. DIE EFFEK VAN DIE DOOP**

#### **7.1 Ons ontvang dieselfde geestelike identiteit en gesag as wat Jesus van God die Vader ontvang het**

Dit is dus duidelik dat ons uit die doopwater uit opkom met dieselfde identiteit en gesag as Jesus Christus Homself teenoor alle bose magte (insluitend Satan

<sup>17</sup> Sien ook in hierdie verband Gal. 3:26-27 en Gal. 4: 4-5

<sup>18</sup> Rom 3:24-25; Rom. 10:9; Ef.2:8-9; Hand 15:8-9; Joh. 3:3,5; 1 Pet 1:23 en nog baie meer.

homself)! Daar vind dus 'n identiteits- en 'n gesagsverandering plaas by die doop – nie meer die ou sondige ek nie, maar Jesus wat opgestaan het in my en dieselfde oorwinning wat Jesus persoonlik oor die bose behaal het is nou myne. Ek heers oor Satan en sy demone en het gesag oor hulle om hul te bind en uit te dryf!!

## 7.2 Krag vir dissipelskap

Die doop is dus nie net bloot 'n godsdienstige handeling nie. Ingesluit in die handeling van die doop is krag wat jou hele lewe herdefinieer.

Gelowiges in Jesus word dus deur die doop geherposisioneer vir geestelike gesag ten einde hul dissipelskap in Jesus Christus op te kan neem en Sy groot opdrag te kan uitvoer.

Omdat jy gehoorsaam is aan God se opdrag in die doop, stel dit geestelike krag vry.... *“The point of obedience is the point of power.”* Jy kan dit nie verdien nie – dis net genade.

In Jesus se geval het die Heilige Gees soos 'n duif neergedaal net na Jesus in die Jordaan gedoop is en die Vader het gesê: *“Dit is My geliefde Seun. Oor Hom verheug Ek my.”*<sup>19</sup> Dit is eers van toe af dat Jesus se bediening van kragtige wonderwerke op aarde begin het wat vir ons wys dat daar 'n sekere gesagsverlening plaasvind by die doop.

## 7.3 Onbeperkte geestelike groei

Die doop word die “launching pad” vir jou gees om verder te groei. Jy wil dit nie mis nie....! Die Heilige Gees neem jou as gevolg van jou gehoorsaamheid aan Jesus Christus na nuwe vlakke van geestelike groei. Iets baie misterieus en kragtigs gebeur in die gees by die doop wat eintlik nie met woorde na regte beskryf kan word nie.

## 7.4 Redding vir jou sielsmens

Petrus verduidelik ook aan ons in 1 Petrus 3:21 dat Noag se ark vir ons 'n Ou Testamentiese heenwysing is na die doop van gelowiges en dat hoewel die doop jou nie red nie (maar slegs geloof in Jesus Christus as jou Verlosser) het die doop ook 'n “reddende effek” vir die siel van 'n mens deurdat die mag van Satan oor die sielsdimensie van die mens (en juis om dit gebonde te hou deur sondeskuld) vernietig word.

Nog 'n Ou Testamentiese heenwysing na die doop van die nuwe verbond is waar Paulus in 1 Korintiërs 10 vers 2 sê dat die Israeliete almal in die wolk en in die see gedoop is. Die uittog van die Israeliete uit Egipte dui dus geestelik op ons redding in Jesus by wedergeboorte en die trek van die Israeliete deur die Skelfsee (of

<sup>19</sup> Mat. 3: 17

Rietsee) op die doop wat hulle finaal geskei het van die slawerny wat hul in Egipte ervaar het (m.a.w. die mag van die sonde).

## **8. MISVERSTANDE OOR DIE DOOP**

### **8.1 Reinig die doop my van sonde en maak dit my 'n kind van God?**

Nee. Slegs geloof in Jesus Christus maak jou 'n kind van God en slegs opregte belydenis en vergifnis van sonde reinig jou van sonde deur die bloed van Christus wat vir jou gestort is. By die doop bevestig jy egter dat jy reeds 'n kind van God is en jy bevestig ook dat by wedergeboorte jou gees onbesmet en sonder sonde geword het. In die sielsdimensie en liggaam vind bekering van sonde egter steeds daagliks plaas, soos hierbo gesê.

### **8.2 As ek gedoop word, beteken dit dat ek nie meer sal sondig nie?**

Nee. By wedergeboorte word jou gees onbesmet en heilig en dit is daar (in die gees) waar die gelowige nie meer kan sondig nie. In die sielsdimensie en liggaam moet die gelowige egter daagliks hom- of haarself bekeer deur weg te draai van die sonde, skuldbelydenis te doen en vergifnis te ontvang. (Verwys ook die antwoord tot 8.1 hierbo.)

### **8.3 Ek was as baba gedoop, is dit nodig dat ek weer gedoop word?**

Ja, beslis. Die babadoop is nie die ware doop soos deur Jesus self ingestel nie en kan dus nie dieselfde betekenis in die gees hê nie. Die ware doop van gelowiges is iets wat volg op "geloof in Jesus Christus" en kan dus eers plaasvind wanneer jy doelbewus vir Hom kies.

Soos hierbo genoem, vereis Jesus absolute gehoorsaamheid aan Hom en dit is Sy opdrag dat ons gedoop moet word. Weereens, volgens Efesiërs 4:5 is daar net één doop.

### **8.4 Ek is nie 'n lid van 'n spesifieke kerklike denominasie nie – moet ek nog steeds gedoop word?**

Die opdrag van Jesus om jou te laat doop het niks met enige spesifieke kerkverband te doen nie. Die doop van gelowiges is vir enige gelowiges in Christus Jesus (wat op grond daarvan deel van Sy Bruid is). Lidmaatskap van enige kerklike denominasie is dus geensins 'n voorvereiste en/of enigsins relevant tot die vraag of ek my moet laat doop nie.

## 9. SLOTOPMERKINGS OOR DIE DOOP

'n Mens kan dus sê dat vir 'n gelowige om gedoop te word is om 'n sigbare en uiterlike verbond met Jesus Christus aan te gaan. Dit beseël jou reeds bestaande verbintenis en verbond met God.

Alhoewel die doop jou nie opsigself red nie (net geloof in Jesus Christus red), bly dit 'n feit volgens die Woord dat Jesus beveel het dat ons gedoop moet word as deel van die "Groot Opdrag"<sup>20</sup> wat hy vir elkeen van ons het.

Elke wedergebore Christen behoort dus gehoorsaam te wees aan hierdie opdrag en hom/haarself te laat doop. Dit is nooit te laat om jouself te laat doop nie.

Die doop is beide ongelooflik mooi en geestelik kragtig. Daarmee maak jy 'n verklaring aan die Here, jouself en die res van die wêreld (asook die geestesrealms) dat jy vir ewig verbind is aan Jesus Christus.

Dit is onbeskryflik geloofversterkend en in tye van aanvalle deur die vyand (duiwel) waarin jy miskien kan begin twyfel of jy gered is, dan staan die doop soos 'n "paal bo water" en kan jy daaraan vashou "dat jy gedoop is" en dat Jesus Christus dus daarmee in 'n ewige verbond met jou getree het en dat dit nie weer ongedaan gemaak kan word nie. Die doop is dus my konkrete verwysing dat ek met Jesus Christus verenig is.

1 Joh. 5: 7-8: *"En daar is drie wat getuig op die aarde: die Gees en die water en die bloed, en dié drie is eenstemmig."* 1 Joh. 5: 11-12: *"En die getuienis behels dit: God het ons die ewige lewe gegee, en dié lewe is deur Sy Seun. Wie die Seun het, het die lewe: wie nie die Seun van God het nie, het ook nie die lewe nie."* Al ooit gewonder wat presies 1 Joh. 5: 7-8 beteken? Die verwysing na die bloed is na ons wedergeboorte wanneer die bloed van Jesus Christus ons van die straf van die sonde bevry en ons kinders van God word, die verwysing na die water is na die doop van gelowiges waar ons saam met Jesus sterf en saam met hom opstaan en dus sodoende die oorwinning saam met Hom behaal het en die Gees verwys na die doping met die Heilige Gees wanneer ons krag ontvang om as dissipels van Jesus Christus die wêreld in te gaan en die evangelie te verkondig. Kinders van God het dus drie getuies<sup>21</sup> wat vir hulle getuig van hulle redding ten einde geloofsekerheid en krag in hul werk as dissipels vir Jesus Christus te bring.

Dit is egter belangrik om in gedagte te hou dat ons al gesien het hoe mense wat deur die doop van gelowiges gegaan het vir 'n wyle opgewonde is maar dan weer na hul ou lewe terugval. Dit bly dus 'n keuse of 'n mens God deur Sy Gees met die doop van gelowiges gaan toelaat om voortdurend in jou gees en siel nuwe dimensies van geestelike groei en outoriteit in Christus laat deponeer en of mens

<sup>20</sup> Mat. 28: 19-20

<sup>21</sup> Die bloed, die water en die Gees

die deur na 'n nuwe geestelike avontuur saam met die Heilige Gees gaan toeklap. Ons sien byvoorbeeld ook dat onbelyde sonde, onverwerkte pyn en trauma uit 'n persoon se verlede (om maar drie voorbeelde te noem) daardie persoon se geestelike groei, selfs ná die doop, kan verhinder. God dwing Homself op niemand af nie. Ons moet Hom dus toelaat om ons wil, denke en emosies in lyn met Sy uitsprake en wil te bring<sup>22</sup>.

Laastens, die Skrif is vol voorbeelde van waar seëninge van God volg op gehoorsaamheid. God die Vader sal jou gehoorsaamheid aan Jesus Christus (om jou te laat doop) eer en die seëninge wat Hy vir jou in die gees gereed hou vrystel sodat jy met krag en gesag jou dissipelskap in Christus kan opneem!

(Saam met die doop deur onderdompeling in water gaan die doping met die Heilige Gees. Vir meer inligting oor die aspek van vervulling met die Heilige Gees, verwys ook na ons dokument oor "Doping met die Heilige Gees", verkrygbaar op ons webblad [www.ignitedinchrist.org](http://www.ignitedinchrist.org))

**GENADE, VREDE EN LIEFDE VIR JOU IN ONS HERE JESUS CHRISTUS!**

(Ignited in Christ – Desember 2017 - Geen kopiereg voorbehou)

---

<sup>22</sup> Op. 3:20